





23





# HARANGVE

PRONONCEE A

l'ouuerture des Estats Gene-  
raux du pays de Languedoc,  
par Monsieur le Duc de Van-  
tadour, Pair de France, Lieu-  
tenant General pour le Roy  
en ladicte Prouince, le 8. No-  
uembre 1622. en la ville de  
Beucaire.



A L Y O N,

Chez Iean Iullieron.

---

M. DC. XXII.



Case

F.

39

.326

1622 ty

THE NEWBERRY  
LIBRARY



## H A R A N G V E

*Prononcée à l'ouverture des Estats  
Generaux du pays de Langue-  
doc, par Monsieur le Duc de  
Vantadour, Pair de France,  
Lieutenant General pour le Roy  
en ladicte Prouince, le 8. No-  
vembre 1622. en la ville de Beau-  
caire.*



ESSIEURS,

Les peuples de  
Sparte furent bien  
estonnez quand ils  
virent seulement vn  
Proconsul de Rome au lieu & place  
du Dictateur du peuple Romain, qui

auoit en sa main l'autorité & la  
puissance Imperiale. A plus forte rai-  
son les Estats de Languedoc ont iuste  
occasion d'auoir vn plus grád eston-  
nement de voir aujourd'huy seule-  
ment vn Lieutenât de Roy qui n'est  
que l'ombre de ce corps, vn petit  
rayon de ce grand Soleil de la Ma-  
jesté Royale, que vous croyez avec  
moy vous esclairer, & honorer au-  
jourd'huy de sa presence:& vous fai-  
re entendre par sa bouche ses volon-  
tez, ses intentions,& ses commande-  
mens; mais ce qui vous doit conso-  
ler, c'est que ce qui est differé n'est  
pas perdu, & que vous aurez cet hō-  
neur de voir sa Majesté deuant la fin  
de ces Estats,m'ayant commandé de  
vous en asseurer,& de sa Royale pro-  
tection & bienueuillance,de la quel-  
le vous avez ressenti de si signalez  
effects que cela vous oblige de tra-  
uailer



3  
uailler diligemment à l'exécution du  
contenu de ses lettres patentes, dont  
la lecture vous à esté faicte presen-  
tement.

Il n'y a personne en ceste compa-  
gnie, dans la Prouince, ny dans le  
Royaume qui ne sçache que le Roy  
a eu sur ses bras cinq armées, quatre  
de terre, & vne de mer: dont la des-  
pence de la derniere reuient à sept  
cens mille liures par moys: Iugez par  
là combien est grande & excessiue  
celle des quatre restants, dont le pro-  
grez de l'armée Royale à esté tel que  
vous l'auiez peu entédre dés le com-  
mencement du Printemps: le Roy  
ayant fait faire en six iours soixante  
lieuës, s'est rendu dans les Isles de  
Bretagne, ou Monsieur de Soubize  
chef des Rebelles de ces quartiers là  
estoit avec vne forte armée, laquelle  
fut desfaite par les armes victorieu-

ses de nostre grād Roy, qui passa des  
 premiers à gué vn bras de mer, &  
 monstra par ce moyen le chemin à  
 tout le reste: les ennemis s'espouuan-  
 tent, toute la caualerie est mise en  
 desroute, l'infanterie est taillée en  
 piéces, grand nombre de morts, de  
 blessez & de prisonniers: ils perdent  
 toute leur artillerie avec les vaisseaux  
 sur lesquels ils pensoient se sauuer.  
 Cela fait, sans prédre haleine, le Roy  
 s'engage au siege de la ville de Royā,  
 place Maritime, forte & bien bastiō-  
 née, ce qui est considerable: & de là  
 s'en vient avec vne diligence incro-  
 yable en Gascongne, & au haut Lan-  
 guedoc, assieger & prendre les villes  
 de Negrepelisse, de saint Anthoin,  
 de Carman & autres. Puis apres il  
 descend avec la mesme diligence au  
 bas Languedoc, où il prend les villes  
 de Lunel, d'Aymargues, de Massil-  
 liargues,

liargues, de Somnieres & autres que vous voyez deuant vos yeux : dont s'enfuit le siege de la ville de Montpellier, la plus importante de toute la France pour les Rebelles, puis qu'elle a esté honorée de l'establissement de deux compagnies souueraines. En ce siege sa Majesté a à combatre non seulement les ennemis, qui l'ont fait souuent armer de toutes pieces, mais encore l'infection de l'air & des maladies contagieuses, auxquelles il a exposé sa Royale persóne: en quoy il a acquis sur vous vne obligation si grande qu'elle se doit plus admirer que la représenter par discours. Tout cela, Messieurs, vous oblige à l'exemple de vos Predecesseurs, d'offrir au Roy tout ce qui est en vostre pouuoir, vos vies, vos biens, & ce qui en despend. Les siecles à venir auront peine de croire ce qu'aujourd'huy  
toutes

toutes les Italies, les Espagnes, les Allemagnes, & en vn mot tout le monde contemple, avec admiration de voir vn ieune Prince à l'aage de vingt & vn an quitter les plaisirs Royaux, prendre les armes sur le dos, & en moins de deux ans auoir acquis & conquis par sa valeur & bonne conduite plus de quatre vingts villes, aux Prouinces & pais de Bearn, de Poictou, de Xainctonge, de Berry, de Guyenne, de Gascongne, & du haut & du bas Languedoc, qui sont des merueilles telles que trois siecles auparavant n'en auoient point veu autant. Au surplus, Messieurs, apres auoir parlé de ce qui concerne sa Majesté, ie me recognoy obligé de vous représenter comme vous serez responsables deuant Dieu de tout ce que vous conseillerez, procurerez, & consentirez en ces Estats, où vous deuez



deuez-embrasser de tout vostre pou-  
 uoir le bien & le soulagement du  
 pauvre peuple si accablé de misere  
 & de calamité, ceste Prouince ayant  
 serui depuis vingt-deux moys de  
 theatre où se sont jouées les plus san-  
 glantes tragedies de toute la France,  
 ny ayant aucun Diocese qui ne se  
 soit ressenti de ceste calamité publi-  
 que. Vous estes aussi obligez de vous  
 despouiller & despartir de toutes  
 passions & affections particulieres,  
 afin que le bien public marche touf-  
 jours deuant comme il se doit. Je ne  
 puis passer soubs silence les grandes  
 plaintes que l'on a faictes au Roy  
 premierement, puis à sa Cour de  
 Parlement de Tholose, des abus &  
 maluersations qui se commettent  
 dás les assiettes des vingt-deux Dio-  
 ceses de ceste Prouince, où l'on a vsé  
 de grands dons, gratifications, re-



compences, taxations de voyages, double employ de parties payées, & autres excessiues despences qui tournent tellement à la foule & oppression des subiects du Roy: que de cēt escus qui s'imposent, il n'en vient pas dix à la bourse de sa Majesté: & sur cela i'ay souuenance qu'il y a enuiron dix-huict ans que ie retranchay plus de soixante mil francs, à la descharge & soulagement des habitans de la Ville du Puy, & de leur Diocèse: tout cela, Messieurs, auoit donné sujet & fondement à l'Edict des Esleus, qui fut sur le point d'estre verifié & enregistré en ladiète Cour de Parlement, ou ie fis en vostre faueur & aduantage les remonstrâces telles que vous les pouuez desirer: & lesquelles ie reïteray en la presence du Roy, assisté des Princes de son Sang, Cardinaux, Ducs, Pairs, & Officiers de  
de

de la Couronne, & autres des Principaux Seigneurs de son Conseil: ou ie fus assisté de quatre Messieurs les Prelats, autant des Barons, & le double du tiers Estat: tous lesquels sont tesmoins comme ie me suis rendu caution de vos bons & dignes comportements, que vous apporterez tousiours la bonne conduite & direction qui est necessaire aux affaires publiques, pour bien mesnager les impositions qui se font sur le peuple. Que vous ferez tres-aises que les abus soient chastiez, en conseruant routesfois l'vsage ancien de vos Priuileges; que si dans l'ordre de la Iustice il se trouue des Officiers qui commettent des concussions, il ne faut pas pour cela abolir les Parlemens, mais chastier les delinquants: car, Sire, c'est vous qui par dessus tous les Roys de la terre, regnez par

la Iustice, dans la Iustice, & avec la Iustice: ce sont les mesmes mots que ie dis. Et prins la conclusion telle, que sa Majesté tesmoigna m'en scauoir tres-bon gré, & incliner à ma demande. l'obmettois encor à vous dire vne autre plainte que le Parlement fait contre ceste compagnie, qui est, qu'au lieu que de toute ancienneté les Euesques, ne se trouuans point aux Estats, y enuoïët les grâds Vicaires qui exercent ceste charge dans le siege Episcopal: & auourd'huy au contraire, l'on enuoye des Vicariats en blanc, qui se remplissent du nom des Chanoïnes, ou autres Aumosniers qui se retrouuent à la suite des Estats: que le mesme abus se fait en l'absence des Barons, leurs Baillifs y deuoient assister: & au contraire, les procurations en blanc, se remplissent du nō des Gentils-hommes,

mes, qui se retrouuent aux Estats, & y ont bien souuent des affaires particulieres; vous priant, Messieurs, de suiure en cela les anciennes formes, & de prendre en bonne part ce que ie vous en dis, qui prouient d'un cœur remply d'une tres-parfaicte & entiere affection à vostre seruice, & qui ne respire autre chose (apres le seruice du Roy) que la conseruation & manutention de vos Priuileges, franchises, & libertez. Et en ceste volonté ie finiray ce discours, auquel ie ne m'estois point préparé, comme ie vous ay dit (Messieurs) au commencement: aussi n'en auois-je pas eu ny le temps, ny le loisir. Je conclurray donc par le dire d'un Poëte François,



*Sacré fleuron de Lys qui ieune promets  
rendre*

*Esgaux tes verds Lauriers , aux Lau-  
riers d' Alexandre.*

Ce sont les vœux , ce sont les sou-  
hais que ie fais pour vous mō grand  
Roy, qui estes icy present par vostre  
autorité & puissance souueraine:  
ainsi puissiez vous triompher , non  
pas despouillé de vos ennemis, mais  
bien de leurs cœurs, & de leurs pro-  
pres volontez ; ainsi puissiez-vous  
conuertir la rebellion en obeissan-  
ce, & les rebelles en fidelles subiects;  
ainsi soyez tousiours victorieux &  
trionphant , & de la guerre & de la  
paix ; Vous voicy donc arriüée ô  
bien-heureuse paix, fille du Ciel, me-  
re feconde des biens de la terre : les  
Anges vous preconisent au Ciel , les  
hommes vous reclament en terre;  
ce



ce sera vous qui accompagnerez  
tous-jours nostre invincible Monar-  
que, pour le rendre l'arbitre de la  
Chrestienté: & le Juge par conse-  
quent de tous les differents des Roys  
& Princes de l'Europe.

F I N.



